

# HISTORIA MORBI,

Quo nuper mortuus est

THOMAS HURDMAN.

Pret. 6*d.*



# HISTORIA MORBI,

Quo nuper Mortuus est

Thomas Hurdman,

*Londinensis:*

CONSCRIPTA

à GULIELMO GRÆME.



L O N D I N I:

Apud T. WARNER, ad Insigne Æthiopis,  
in Pater-noster-Row. M.DCC.XXX.





# HISTORIA MORBI,

Quo nuper mortuus est

THOMAS HURDMAN.



Nihil magis optandum est in totius humani generis commodum, quam ut talem haberet perfectionem, nobilis ars medica, unde certe statuere poterint artis professores, de natura omnium morborum quibus obnoxios inveniunt ægrotantes; atque remediorum his convenientium: tunc equidem facillimum esset judicare, an morbus sanabilis, an vero ultra artis limites positus. Insanabiles itaque non cerneremus inepta medicatione exasperatos; neque alios, vel neglectos, vel perversa mendendi



dendi methodo, periculosos & sæpe lethales redditos ; dum naturam à tramite quem sponte secutura fuisset, flectere & detorquere conatur. *Naturæ ministri non vero domini sunt medici.* Dolendum est tamen quam maxime, medendi artem, nullam talem attigisse perfectionem ; multa etenim sunt quotidie in morbis occurrentia, unde dubij hærere coguntur peritissimi, & in praxi versatissimi viri. Boni revera est, & cordati medici, ulteriorem artis progressum totis moliri viribus ; neque aliud est quod huic negotio magis conducere, quam si omnes medicinam facientes, sedulo animum intenderent, ad accuratam observationem illorum omnium, quæ in morbis, vel lædere, vel juvare vident, hoc etenim pacto, neque tenaciter nimis Via, ab experientia reprobata, insisterent, quocunque demum freti ratiocinio ; nec remedia simpliciora, sed magis salutaria contemptuose negligenter : hoc modo crevit apud veteres saluberrima ars, utinam medicos recentiores vellent illam, omnium optimam medicinæ partem quæ historias tradit morborum, novis suis & fidis observationibus ditare.

Mœstissimus aggredior descriptionem morbi, quo nuper extinctus est, Vir optimus & mihi amicissimus ; morbi sane, quantum mihi perspectæ sunt leges medicæ, unde hæcce nosci possunt, ex sua natura minime lethalis.

THOMAS HURDMAN agens annum ætatis trigimum secundum, staturæ mediocris, corpus habuit agile satis, licet habitus paulo plenioris ; solida enim paululum laxiora, quodammodo ad obesitatem disponebant, licet non admodum ; color faciei & reliqui corporis bonus ; oculi satis vividi ; morbis non admodum obnoxius vixit, ante aliquot annos varicellæ laboravit, unde optime evasit ; neque aliquid reperiundum fuit, quod reliquias, ullius morbi prægressi, ullibi latentes notabat. Negotiis semper multum implicitus, subinde in vini fortioris computationem, licet invitatus alliebat ; appetitus illi parcior erat, sed digestio satis bona ; animi fuit hilaris, & subinde exercitiis saltatione, &c. utebatur, & aliquando paulo forte immoderatus, ad motus quippe hosce exercendos, agilis, aptissimusque fuit.

Die Octobris decimo-quinto, sanitate solita fruentem, negotia quædam appellabant ad vicum quendam, ad fluminis ripam ulteriorem positum ; ab urbe quædam milliaria distantem ; ubi forte accidit vinum liberius bibere, postea scapham ingressus, & aeri frigidissimo nocturno supra aquam expositus, domum circa horam primam matutinam rediit, & petivit lectum. Tota ista nocte, & sequente die, mensis decimo-sexto, morbi primo, se ægrum & febriçantem sensit, de dolore capitis & spinæ dorsi

dorsi inferioris conquerebatur, multumque fiebat; liquore possético vel potu aliquo tenuiore usus est, nocte sequente in sudorem incidit, & postridie se satis bene credebat, ita ut ad solita negotia facienda in publicum prodiit: sub noctem vero rediere dolores & febris, sudore tamen aliquatenus prodeunte, iterum paululum liberatus fuit. Hæc mihi narrabantur. Die jam mensis decimo-octavo circa vesperam, pro prima vice ex quo ægrotabat eum videbam; pulsus fuit velocior, ordinatus vero satis; calor corporis, sani gradum excedens; sitis magna; de dolore ad loca dicta querebatur, licet jam mitiore. Ego qui sælix adeo non sum ut de genio febris cujuscunque primo intuitu judicem, nihil ista nocte præscripsi, nisi ut biberet copiose ex decocto hordei vel liquore possético tenuissimo.

Die mensis decimo-nono, morbi vero quarto, ægrum mane iterum invisebam; noctem sat placidam habuit; pulsus jam arteriarum multo tardior; vix ullus dolor; sitis minor; febris fere nulla aderat; per noctem sudavit; lingua tamen arida fuit, & sordibus flavescentibus obsita; in vomitum quoque proclivis per noctem fuisset; & sapor in ore erat amarus; color oculorum flavescens; urina quam ante aliquot horas eminxit, & meo jussu afferabant, crassa fuit, & instar, (ut loquitur Hippocrates) jumentorum.



Siste jam lector medice, quicumque es, qui Græcorum doctrina, & vera medica imbutus, qui interiora corporis scrutatus, de natura morborum recte judicare potes. Vos reliqui qui in mortalium perniciem, artem quam non didicistis, exercetis, procul este profani: vos & vestra non moror. Obnixè à Pœoniæ artis magistris rogo, ut mihi dicerent, quid de morbo, quem præ oculis ponere conatus sum, sentiendum fuit? sententiam meam candide exponam. Quoad diagnosin qualis est febris? heri febricitabat æger, hodie vix; heri de dolore conquerebatur, hodie non ita; sudore prodeunte symptomata mitigata sunt: An igitur est febris intermittens? sane verisimile. Sed vix notabile frigus, vel tremor, paroxysmum antecedebat, quod in intermittentibus solenne est; neque jam apyrexia plena obtinet, febris enim quodammodo manet; neque sedimentum in urina reperitur, ægrum a paroxysmo liberum notans. An igitur est febris remittens, cum remissionibus, & acerbationibus iterum, comitata; & ad genium intermittentium accedens? res equidem minime improbabilis videtur. Observavit vero olim sagacissimus Sydenhamus, quod in principio febrium intermittentium, quæ autumnō contingunt, haud ita in proclivi esse typum sub primis invasionis diebus rite distinguere, quandoquidem febre continua adscita, primum adoriuntur, neque facile est aliquandiu nisi diligenter

diligenter adverteris animum, quicquam aliud præter aliqualem morbi remissionem deprehendere, quæ tamen paulatim in perfectam definit intermissionem, & typum anni tempestati apte respondentem. Potius itaque forte expectanda est febris intermittens; modo vero sit diagnosi in dubio. Quæcunque vero sit res hæc, quo statu sunt corporis fluida? nimis sane confusa & mota, ut ex urina crassiore, & oculorum colore, ubi vasa tenuissima statum contenti liquoris optime monstrant, clarum est; neque hinc improbable videtur partes bilis secretioni addictas, à fluido lentiore quodammodo obstrui. Quoad prognosin, Quo loco ponitur æger? si intermittens est febris, erit tertiana, igitur non valde periculosa, præsertim quia initia paroxysmorum non vehementia videntur. Si continua remittens; jam agitur dies quartus, symptomata statim mitissima sunt, functione nulla multum læsa; non vehementer igitur procedit ad ἀκμην morbus; vitalia sunt illæsa. An magnum itaque imminet periculum? revera non.

Quid jam faciendum fuit? an vena secanda erat? Equidem monuit Sydenhamus intermittentium autumnalium curationem, non sine ingenti discrimine per phlebotomiam tentari, quod & frequenti nimis observatione se didicisse asserit; inde etenim vel diutinus morbi cruciatus, vel mors sequitur.

Pone jam morbum fuisse remittentem, an venæ sectio utilis? Dum diagnosi dubia manet, nihil temere agendum: nihil grave urget, vires naturæ non nimis minuendæ sunt, ni coctioni & crisi impares fiant, & febris hæcce lente procedit; iterum genius hujus morbi videtur crisin moliri per sudores, sed crisin non esse turbendam, sæpius ingeminavit Hippocrates; & licet remittens erit, certe multum participat de intermittentium natura; ergo nisi multum fallor damnosa fuisset venæ sectio.

An per vesicatoria tentanda est curatio? Olim notavit Hippocrates Febres Hyemales sæpe transire in morbos acutos *περι πνιδων*, sect. 12. notavit quoque Sydenhamus, calefacientium usu, intermittentes in continuas mutari. Rogarem vero medicos quibus arridet talis practicandi methodus, an aliquid noverint quod magis calefacit, quam Cantharidum applicatio? Attendant quæso eis quæ ægris accidunt, quando stranguria ab inflammatione partium, secernendæ urinæ dicatarum laborant, præterquam dolore cruciante in applicationis loco, & tunc candide respondeant. Quatenus attinet evacuationem à vesicatoriis factam, quid boni expectandum à pauxillo sanguinis feri detractō, ubi tota sanguinis massa morbosa forte est, & ubi optima natura alias vias ad ejus partes vitiosas eliminandas monstrat?



monſtrat? Verendum eſt equidem ni reliqua maſſa craſſior maneat, & motu nimio ſemel impreſſo circumeunti ſanguini, omnino incertum eſt ubinam forte, pellendæ ſunt partes lentiores; unde ſane ſumma pericula. Qui chemicam callent doctrinam, ſciant quoque naturam alcalicam Cantharidum, putredinem febricitantis ſanguinis accelerare. Sed theoriæ haud multum faciens, velim ut mihi dicerent medici, qui in omni fere febris ſpecie Cantharides adhibent, qua auctoritate ſuffulti hoc faciunt? Apud artis principes nihil hujusmodi reperitur; neque medicos hodiernos in reliquis Europæ regionibus conſentientes habent; ſi quiſque experientiam propriam forte jactitabit, meminerit effatum *Divini ſenis*, experimentum eſt periculofum & judicium difficile. Sed hæc obiter: Ut ad rem redeam, certe turbæ neceſſario concitandæ, poſt veſicatorium appoſitum, in præſenti caſu mihi omnino uſum cantharidum prohibere videbantur.

An per cardiaca fortiora res tentanda fuit? ſane ſi febris erat intermittens, tota reclamatur experientia: ſi non, tunc minime videbatur neceſſarium vires febris augere, calidorum ingeſtione, corpori juvenili, & vini uſu nimio inter alias morbi cauſas ægrotanti; hujusmodi ægris domi naſcuntur cardiaca, & quæ foris adduntur, aut fruſtanea ſunt aut etiam damnosa, inquit ſapientiſſimus & nunquam  
ſatis



fatis laudandus Sydenhamus. Verum est talia sudores provocare, quod & genio morbi præsentis congruere videtur; norunt tamen medici rem longe aliam esse, sudorem stimulantium ope exprimere, unde semper incrassatur massa sanguinea, quam sudorem lente promovere, fluida cum novis liquidis supplendo, quæ materiem sudoribus præbent; medicamento leniter solvente forte addito: in hocce casu, præmonstrante natura crisim promovere poterimus, in altero vero crisim solummodo turbare, & vires morbi augere, *judicatoria enim non judicantia, partim lethalia sunt, partim difficilis judicationis*; Hipp. Epidem. B. Absint igitur Cardiacæ dictæ. Quid igitur agendum est? Ego horum omnium bene monitus, præscripsi tantummodo ut æger abstineret a cibo crassiore; ut pro victu uteretur jure gallinaceo tenuissimo, vel panatella; ut pergeret in usu potus supradicti ex decocto præsertim hordei, & circa horam vespertinam sextam vel septimam emeticum \* caperet leniorem, ad primas vias alluendas, sordibus, uti dictum, obfitas; & haustum paregoricum† ad

\* R<sub>x</sub> Rad. Ipecacuan. recens pulverisat. ʒss.  
Tartar. emetic. gran. i. M.

† R<sub>x</sub> Aq. Lactis alexiter. ʒiss.  
Cinamom. ten. ʒss.  
Pulv. e chelis cancr. comp. ʒ i.  
Laud. liquid. gutt. xv.  
Syr. Caryophyllor. ʒiii. M.  
Capiat h. s.

ad sedandos motus ab emetico concitandos exhibere curavi. Neque aliud quidpiam die isto necessarium duxi. Emeticum sumpsit, & sæpius vomuit, bibendo affatim cyathos quosdam infusi tenuioris thææ viridis, postea paregoricum haufit. Nox vero quæ sequebatur, multo magis molesta fuit quam præcedens, quod equidem eventurum credebam, si febris e genere tertianarum esset, cujus rei suspicio insignis mihi jam orta fuerat.

Die sequente, mensis vicesimo, morbi vero quinto, mane ægrum iterum adibam, sudantem reperii conquerebatur multum de molestia noctis peractæ; aiebat tamen se non adeo doloribus cruciatum fuisse ac ante biduum; calorem vero, ac sitim, ante sudoris eruptionem fuisse maxime gravem. Rogatus si quid frigoris anteisset calorem? Respondit, non. Pulsus fuit plenus, fortis satis, & ordinatus, licet velocior, non vacillans robore, nec tempore quo repetebantur ictus; respiratio optima: dixit tamen, se dolorem quendam, sed non vehementem, sub costis nothis sinistri lateris, dum calor magnus fuit, sensisse qui jam abivit. Color flavescens oculorum manebat; urina quam media nocte eminxit, rubra & saturata fuit, nullum deponens sedimentum; quam versus auroram reddebat, habuit nebulam in medio suspensam,

fulpenfam, nihil tamen ſedimenti ad fundum ; dolor capitis & dorſi, ſed levior, adhuc manebat. Quid jam ſtatuendum de morbi natura? an aliquid mutandum in ſententia quam heri concepimus? equidem non multum. Acerbatio quippe tempore expectato accidit ; jam omnia mitiora iterum ſunt, licet febris quodammodo manet. Erit itaque certiffime vel tertiana, vel remittens ad tertianarum naturam quam maxime accedens. Sed jam urina incipit nebulas habere, quæ heri maxime turbata fuit nihil deponens ; ſpes igitur imminet, ſedimenti in urina brevi futuri apyrexiam notantis ; habebimus itaque vel tertianam, vel febrem penitus ſolutam, unde prognofis melior. Quid modo medice agendum? præſcripſi ut æger, qui jam multum ſudavit, maneret lecto affixus donec deſineret ſudor prodire, & biberet liquores tenues ante dictos, tepidos equidem, non vero adeo calidos, ut ſudorem provocarent nimis; quo abeunte, e lecto ſurgere ſuaſi. Quoad victum, jus tenue e carne pulli cum pauxillo panis permixti ; & pro potu, idem decoctum hordei, cui addere ſubinde juſſi cochleare unum aut alterum Vini Rhœnani, nihil ſælicius diluere bene gnarus ; & ægro ſummopere flagitante hauſtum cereviſiæ tenuis tepefaetæ, cum pane toſto, indulſi, unde ſe multum levatum eſſe dixit. Ad lentorem fluidorum diſſolvendum, præſcripſi



\* haustum e fale absynthii & succo limonum, sexta quaque hora sumendum; hæc duo enim commista mutantur in salem instar polychrestii, qui vix nocenti acrimonia præditus, optime incidit, ut apud practicos est in confesso. Sed quia dum moventia adhibentur, liquidorum ad diluendum semper opus est, ne fluida partibus liquidissimis orbentur, præter potum dictum, † haustum emulsionis omni bihorio sumendum iussi. Hæc facta sunt. Me vero absente, Pharmacopœius quo utebatur æger, nescio quid somnians de qualitate refrigerante præscriptorum, præsertim haustus salini; & miratus nihil fortius præscribi, suavit ut æger biberet quædam pocula vini, & sex vel septem bibit, unde se plus febricitare sensit. Sub vesperam me iterum accersitum mittit. Inveni paroxysmum vel exacerbationem ultimam, non penitus finitam; febris quippe durabat,

R̄x Suc. Limon. recens express. ʒvi.  
 Sal. Absynthii ʒss.  
 Aq. Cerasor. nigr. ʒiss.  
 Cinamom. ten. ʒss.  
 Sach. alb. ʒiii. M.  
 Capiat sexta quaque hora.

† R̄x Sem. 4 frigid. maj. ana ʒii.  
 Papav. alb. ʒi.  
 Amygd. dulc. excorticat. n. xii.  
 Aq. decocti hordei lbii.  
 F. s. a. emulsio addendo  
 Aq. Cinamom. ten. ʒiss.  
 Syr. Balsamic. Diacod. ana ʒvi.  
 M. Capiat ʒiii. omni bihorio.



durabat, non vehemens tamen, a potu vini, ut probabile videbatur, diutius protracta. Pharmacopœius multa mihi dicebat, de malignitate morbi, de necessitate Vesicantium, de Alexipharmacis & similibus; ego vero contra proprium iudicium nihil præscribere volui. Per aliquot dies alvum non deposuit æger, itaque rogatus fui, de clysterio adhibendo, huic ultimo assensum dedi; sed enema \* lenissimum præscripsi, ad fæces solummodo extrahendas sine metu turbæ ulterius: Sed antequam præparatum fuit, æger alvum deposuit, itaque meo jussu non injicebatur. Ægro in lecto jacere suasi, largius bibere e decocto, & emulsione, a vino & omni liquore spirituofo abstinere, & in usu haustus præscripti sexta quaque hora pergere; & monui noctem sequentem probabiliter sat placide transituram, quia alternis noctibus hoc evenire jam observavi.

Die sequente, mensis vicesimo primo, morbi sexto, omnia in melius mutata inveni; æger plenius per noctem sudavit; febris jam omnino aberat; nullus prorsus dolor; pulsus sedatus, equalis, sanus equidem; sedimentum in urina optimum, febrem penitus pro ista vice judicatam demonstrans;  
calor

\* R<sub>x</sub> Decocti communis pro Clysterib. ℥viii. addendo in decocto sem. Coriandri contus. ℥ss. in Colatura dissolve Elect. lenitiv. ℥vi. Ol. Chamomel. ℥i. M.

calor totius corporis mitis, æqualis; respiratio bona; æger hilaris, & ad omnia aptus, nisi quod aliqualem lassitudinis sensum, levissimum tamen percipiebat; & unum erat quod observare potui, colorem scilt. oculorum non penitus ad naturalem rediisse, licet revera flavedo minime insignis fuit; ex duobus hisce ultimis, ut ex genio morbi antea perspecto, conclusi morbum alios adhuc paroxysmos habiturum, de quo ægrum & adstantes monui; licet Pharmacopœius qui tam multa heri de morbi maligna natura garriebat, jam sententiam suam omnibus protulit, ægrotum jam penitus a morbo liberatum esse, & nullum esse metum recidivæ: aiebat tamen se multum mirari naturæ bonitatem, quæ tam salutarium excitasset sudorem, quando omnia præscripta huic negotio contraria fuerunt. Si bene de effectis medicamentorum pronunciavit ille vir, judicet lector medicus. Condonent me quæso omnes, quod ineptias hæc Pharmacopolæ narrare moratus sum; ex se equidem ineptissimæ sunt, sed tragoediam funestissimam, brevi lursuræ. Sed ad rem redire: Qualis jam est morbus? tertiana revera exquisita. Alternis diebus enim ab initio usque semper intendebatur; antea tamen nunquam penitus intermisit, sed omnes practici norunt, hoc ut plurimum obtinere in initio tertianarum, præsertim autumnalium, vel hyemalium;

jam perfecta obtinet apyrexia. An redibit febris? certe; tertiana enim non tam cito sponte sua finitur. An morbus est periculosus? perpendito, quæso lector benevole, medicinæ leges & dicito.

Respiratio bona est, & facilis; pulsus arteriarum tardus, constans & quoad robur, & ictuum numeros; calor moderatus, & undique æquabiliter diffusus: Quomodo ergo se habent partes, functionibus vitalibus dicatæ? certe quam optime tota clamat medicina. Sitis jam abest; sapor amarus ex ore fere evanuit; lingua humida, mollis est; æger appetebat cibum, tenuis ille qui concessus fuit nullam in ventriculo molestiam concitabat; excretionibus optimæ, sudor quippe omnino levans, & urina ejusmodi, ac pro genio morbi optima. Qualis ergo conditio, functionum naturalium? bona equidem. Sensus omnes interni, externique prorsus illæsi sunt; animi affectus sedati; omnium muscutorum motus sat facilis, nisi quod levis fatigationis sensus manet. Quid igitur reperitur functiones animales lædens? revera non multum. Sed recidiva imminet morbi, unde iterum turbandæ functiones; sed an morbi mali moris? Dies morbi jam agitur sextus, functiones omnes bonæ sunt, vehementius itaque non procedit, sed mitissimus est; febris quæ antehac, perpetuo, licet haud æquo vigore, tenebat,



tenebat, jam ad plenam perducta est apyrexiam; urina, quæ in initio maxime fuit turbata, ante biduum sedimentum promittebat, jam sedimentum optimum habet: nonne igitur febris jam incipit regularem induere faciem tertianæ? Suntne fluida totius corporis in meliore quam antea statu? unde itaque metuendum est quid periculi? nullibi revera nisi ex rebus male gestis: qui aliter sentit, monstret quæso, quo nititur fundamento sua sententia. Lenia, quæ jam præscripta fuerant, & juvare visa: non multum itaque in hisce immutandum duxi necessarium; in eisdem pergere jussi, adjuncto \* decocto emolliente & lenissime attenuante, ex inde sperans, paroxysmum sequentem leviores futurum; & si quid forte lateret obstructi, circa hepar, vel partes in illud sanguinem fundentes, (circa locum splenis etenim dolor in initio tenebat, ut antea dictum, & oculi adhuc paululum flavescebant) id solutum iturum.

Nocte sequente, maturius paululum quam antea solitus est ingruere paroxysmus, calefcere multum incipiebat æger, vix ullo frigore prægresso, quo tempore dolor intolerabilis fuit, ad spinæ dorsi inferiora, capite

\* R̄ Fol. Althææ, Ling. cervin. Capill. Vener. ana m.ʒs.  
Rad. Althææ, Sarsæ-parillæ, ana ʒss. Glycyrrh. ʒiii.  
Lign. Santal. citrin. rubr. ana ʒii. M. coq. in Aq. fontan.  
ʒbiii. ad colaturæ ʒbii. capiat ʒiii. omni bihorio.



capite quoque dolore multum affecto ; fitis magna ; urina tunc emissa, rubra, saturata ; post aliquot horas in sudorem incidit, unde leniebantur dolores. Mane me quæsitum mittit ; inveni sudantem, toto corpore, sudore æquabiliter madido ; pulsus velox, sed plenus & ordinatus ; dolores uti aiebat multo mitiores quam ante sudoris eruptionem fuissent, sed adhuc manentes ; a dolore & pervigilio quoque confusio quædam orta videbatur in cerebro, sed levissima ; omnia enim congrue & apposite dicebat, licet iudicio, haud adeo ac in sanitate firmo ; urina nunc iterum nebulam habuit. Quid jam rei est ? Paroxysmus tempore prævisso, licet paulo maturius, advenit ; calor etiam sine frigore sensibili prægresso invasit ; dolores quam antea vehementiores ; unde hæc omnia ? an ex præscriptis ? Ego qui veritatis investigationem, omni arti qua fama quærenda est antepono, sic puto ; forte usus haustus salini, modo dicto, qui est maxime fundens, nimis movebat sanguinis massam, unde calorem excitatum ante tempus invasionis, frigus præcavisse ; & materiem morbi nimis celeriter in musculorum & ligamentorum, circa lumbos, involucra, & in cranii membranas pulsam fuisse. Certissime diluentia optima largius præscribebantur ad tale præcavendum incommodum ; sed ex juvantibus & lædentibus optime discit medicus. Animo

D

itaque

itaque decrevi, falem absynthii vel omnino auferre, vel saltem multo minuere illius dosin, & cum lene attenuantibus procedere. Sed an multa in pejus adhuc mutantur? revera non. Omnis præsentis morbi paroxysmus prægressus, durabat ad minimum per diem integrum, & omnes nisi proxime prægressus longe plus, præsens vero paroxysmus nondum per diei dimidium duravit, & fere abivit; omnia ad naturalem redire statum iterum incipiunt: An facies morbi itaque est valde periculosa? minime. Sed jam lector erudite & candide, ad alium enim non scribo, adverte oculos, & paratus sis scænam longe diversam intueri; sed antequam procedas, mente volvito, & serio perpendito, an ex eis quæ legisti, in meam cadas sententiam, qui calidorum usum inhibere statui, nec vias naturæ ullo modo turbare? an in sententiam diversam, quæ illorum usui, magna ex parte rem committeret; & evacuationes varias tentaret? Sane ex dictis spero, omnibus in promptu esse, dicere quidnam hic dictitat ars medica.

Dies jam agebatur morbi septimus, mensis vicesimus secundus, ægrum uti dictum est mane vocatus invisebam, quem in statu modo descripto, reperiēbam. Sed ante meum adventum, aderat iterum Pharmacopæus, qui seipsum quam maxime idoneum  
ad

ad artem exercendam medicam existimat, & ægro longa consuetudine junctus fuerat; ille multum increpans, nullum potentius uti aiebat remedium fuisse tentatum, suavit alium vocare medicum, cujus forte methodus cum sua magis congrueret sententia. Æger spe allicitus subitanæ sanationis, idem voluit. *Eheu quam vanæ & fallaces sunt mortalium spes!* Circa meridiem, me adventum ejus expectante, ut una consuleremus, ingressus est medicus quidem senior, sed nuperrime tantum, in candidatorum numerum qui focii locum in collegio regio medicorum Londini ambiunt, admissus. Pulsum tetigit ægri, inspexit linguam, post quæstionem unam aut alteram sane paucissimas rogatas, in proximum ingressus est cubiculum; uti putabam ad me de statu morbi rogandum. Res longe aliter evenit; primum omnium chartam petiit, ad formulas remediorum describendas, & scribere incipit: scribendi officium mihi attinebat, si bene novi regulas de quibus inter se conveniunt medici, de nugis vero hujusmodi nunquam disputandum esse existimo. Medicum tunc temporis monui, genium hujusce febris esse serio perpendendum, & quod e genere intermittentium fuit; nihil mei faciens consilii, respondit, in posterum nos hoc videbimus; & scribere pergit; aiens mittendus est sanguis, vereor dixi ne inde morbus in longum



excurrat tempus, si nihil gravius acciderit: respondit tanto citius curabitur. An hæcce est methodus qua investigari debet morborum natura? sicne inter se consulere debent medici ubi hominis vita ab illorum arbitrio pendet? Ego bene cernens illum nihil mihi concessurum, & argumentandi vim in pari casu sæpe incassum expertus, & jurgia non amans, tacui. Alter formulas \* quas hic habetis scripsit, meumque apposuit nomen, chartula ne vel ad inspiciendam mihi data. Post istius medici discessum, ægrum, uxorem ejus, & quosdam ex amicis certiores fæci, omnia jam contra meam sententiam agi; me in posterum consilium nullum daturum esse, licet amicitia ductus, ægrum iterum

\* Mittatur Sang. e Brachio ad ʒx. Applicetur Vesicatorium Nuchæ.

℞ Pulv. e chelis cancr. comp. ʒi.

Lap. Contrayerv. ʒss.

Confect. Alkerm. f. o. q. f.

M. f. Bolus sexta quaque hora sumendus, superbibendo

Julapii sequentis cochlear. iv.

℞ Aq. Cerafor. nigr. ʒvi.

Theriacal. ʒii.

Pœon. comp. ʒi.

Margarit. ʒi.

Sacch. Albiss. f. q. M. f. Julapium.

℞ Sperm. cæti ʒiii.

Solve cum vitello ovi in Aq. Lactis Alexiter. Cerafor. nigr. ana ʒiii.

Tinct. Croci in Vino ʒi.

Sacch. Albiss. f. q. M.

Sumat cochlear. iii. subinde.

℞ Sp. Corn. Cerv. per se ʒiii.

Capiat gutt. xxv, vel xxx bis vel ter in die in haustu potus communis.



iterum invisurus essem, non vero quatenus medicus. Hæc frustra dicta sunt, quod & attendebam, perspexi enim optime quod ante adventum meum mane, decretum fuisse inter ægrum, pharmacopœium, &c. uti consilio novi medici, non meo. Sed meum hoc modo liberavi animum.

Quid expectare fas est a methodo jam proposita? Venæ-sectio, sine dubio, dolores si qui restant, & symptomata omnia mitigabit; sed ad morbum quid faciet? Sane turbabit concoctionem jam inceptam, & expulsionem materiæ morbosæ, motum novum fluidis circumeuntibus imprimendo; hoc ex notis circulationis legibus fieri necesse est; hoc tota firmatur experientia: sed de hac re satis in hujus initio. Vesicatoria & dolore & inflammatione, quibus semper stipata sunt, paroxysmum febrilem jam fere desinentem, diutius excurrere cogent; & periculum magnum est, ne materies morbi antea multum mota, tam insigni stimulo addito, in cerebrum introeat, vel aliam nobilem & vitalem partem. Reliqua præscripta ut calidiora sunt hæc omnia promovebunt. Eventus expectationem haud fefellit, post venæ-sectionem, æger se quodammodo levatum sensit, febristamen manebat. Nocte sequente morbus sibi permissus, quieturus fuisset probabiliter, & revera noctem habuit

æger

æger sat placidam, nisi quod frequenti mictu vexatus fuit; unum tamen erat mali ominis, cerebrum jam gravatum videbatur, & sensus non adeo expediti, unde forte oriebantur fallaces malorum induciæ. Postero die mensis vicesimo tertio redii non medicus, sed amicus amicum visurus, quando quæ modo enarravi didici. Febris tenebat sed non valde vehemens; stranguria tamen tunc temporis vexabat, & cerebrum maxime affectum videbatur, quietus enim & quasi somnolentus jacebat æger; urina saturata & rubra fuit. Rogavi adstantes quid jam sentiebat medicus cui sanitas ægri commissa fuerat; dixerunt medicum hodie pronunciasse eum jam extra periculi aleam positum esse, omnia quippe leviora quam heri fuerant perceperat. Ansam itaque arripuit, medicamenta sua laudandi, & omnia bona promittebat. In eisdem \* pergere jussit; & quasi satis jam non innovatum fuisset, in hoc febricitante corpore \* enema injici curavit. Monui adstantes me certum esse ex genio morbi, noctem sequentem maxime molestam futuram, spemque sanitatis pessime esse fundatam. Uti dictum res evenit, nocte illa maxime

\* Repetatur Bolus sexta quaque hora cum Julap.

Pergat in usu Emuls. cum G. Arabic.

\* R̄ Decoct. communis pro Clysterib. ℥x. Terebinth. Venet. in vitell. ovi solut. ℥vi. Syr. Viol. Mel. Mercur. ana ℥ii. Sal. gemm. ℥iii. M. f. Enema quam primum injiciendum.

Pergat in usu guttarum.

maxime febricitabat æger; omnia mala symptomata vehementissima erant, adeo ut mortem omni momento attendebant adstantes. Hæc mihi narrabantur, nam postea ægrum non vidi. Ille medicus summo mane vocabatur, vesicatoria plura, \* & plura calidiora ut videtis præscripsit. Exanthemata jam erumpebant externa, quæ vulgo ultimam hujusmodi tragoediæ scænam claudunt, corpore adusto quasi, calore morbi regimine calidiore immani reddito. Æger quatenus audivi sensuum motuumque expers jacebat: Cum notaveram tamen tempus jam præteriisse, quo, alternis diebus, semper ab initio intendebatur febris, omnibus quibuscum sermonem de hac re habui, prædixi ægrum  
non

\* Applicentur Vesicatoria Brachiis internis.

Applicetur Emp. Cephalic. cum triplici Euphorb. & Galban. ana p. e. totis pedibus.

℞ Confect. Raleigh. ʒi.

Pulv. e. chel. cancr. comp. ʒss.

Castor. russ. gran. v.

Syr. Croci f. q. M. f.

Bolus sexta quaque hora sumendus superbibendo Julapii perlati cochlear. iv.

Pergat in usu guttarum.

℞ Amygd. dul. excort. N° xxiv.

Sem. papav. alb. ʒss.

f. Emulsio in aq. lactis alexiter. ℥ii. in colatura solve

G. Arabici ʒii.

Tum adde,

Aq. Cinamom. ten. ʒii.

Pœoniæ com. ʒi.

Syr. Althææ ʒiss.

M. Bibat haustum frequenter.



non moriturum ante Diem Lunæ sequentem, (tunc enim agebatur Dies Saturni) quando nova exacerbatio expectanda esset, tunc vero probabiliter eum ad plures migraturum. Res sic evenit, mortuus enim est, circa horam nonam matutinam die mensis vicesimo sexto, morbi vero undecimo. Nihil de præscriptis per duos ultimos dies novi, nisi quod Veficatoria adhuc plura apponebantur ; & medicum tunc pronunciasse ægrum fuisse perditum antequam sibi commissus fuerat, ob neglectam boni medendi methodum.

Sic periit in ætatis flore, vir ob virtutes quas possidebat, quam amabilis, pietate vera erga Deum & morum probitate insignis.

Quædam sunt quæ antequam finem faciam, ut attente mecum perpendere velint medicos oro ; & mihi respondeant sequentibus.

*Primo*, Estne exercitatio artis medicæ res difficilior, quam ut uno momento, ediscere possit medicus, omnia quæ nosse debet circa morbum, antequam ad præscribendum accedat, scrutatus paucissima ab ægro, nihil ex adstantibus, vel ab eis qui ante ejus adventum morbum tractaverunt? Tali modo fama forte captanda est apud idiotas, qui  
laudabunt

laudabant forte hominem, qui facile & nullo fere negotio tam multa intelligere valet. Nemo vero unquam, vel ipsa limina *Æliculapii* ædis adiit, qui non omnia sic practi-  
cantis, vana & damnosa pronunciabit. Itane igitur ludendum est cum hominis vita? Itane decet quemquem medicinominis insigni-  
tum agere histrionem?

*Secundo*, An credunt medici, methodum aliquam universalem medendi, omni feбри aptari, ita ut omnibus indiscriminatim exhibenda sunt stimulantia, sanguis mittendus, & vesicatoria applicanda? Revera quisquis vel unquam evolvit scripta *Divini senis*, aut *Galen*i mentem intellexit, vel nuperrima consuluit *Sydenhami*, longe contrarium pronuntiabit.

*Tertio*, An credibile est Pharmacopœum, qui corporis interiora accurata indagine nunquam contemplatus est; cui ne vel nota sunt monumenta antiquæ & veræ medicinæ, an credibile est, inquam, illum recte de morbis judicare posse? Quando itaque medicus quicumque in hujusmodi hominis sententiam omnino cadit, spreto alterius medici consilio, quid sentiendum est de tali medico? Hocne facit, bono & honesto animo, an turpi quadam ratione ductus? judi-

cent alii, hic mihi silentium impero. Unum tamen notandum est, hoc modo Pharmacopœum in loco medici poni, & medicum illi solummodo famulari; quando necesse est, vel ea quæ vult alter, præscribere, vel ægrum in alius manus tradere, qui obsequiosus magis erit. Dolendum est medicos flexiles adeo, & obtemperantes, in tali casu tam facile reperiri. Aliud est quoque observatu dignum. Ægrotantes ipsi & illorum amici, durationis morbi vulgo impatientes, rogitant medicum, ut talia & talia præscribat, quæ forte maxime sunt inidonea, & exhibita, naturam maxime turbabunt: sed si mos obtinebit inter medicos, quod, si hæc non facta sint, prius vocatum negligentiae alius accedens accusabit, quia ista omissa fuerant; & damna orta a peccato proprio postea commisso, illi attribuet; quis adeo constans & propositi tenax inter nos erit, qui in posterum vulgari methodo non assentiat metu famæ? Et si quid minus recte in ista obtinet methodo, dum hoc modo necesse est illam sequi, dum strenue adeo errores defenduntur; an non sapientes omnes, credent nos conjurasse contra hominum vitas? Itane excoli debet artium omnium pulcherrima!



Ut totam rem ad conclusionem deducam, certe non adeo ægre de medicinam facientibus cenſeo, ut putem aliquem inter illos, volentem aliquid damni ægro ſuo laturum, ſed dum res perfunctorie nimis aguntur, ſæpiſſime ad idem redeunt. Caſum huncce funeſtum protuli, orans omnes ut quæ ſcripſi ante oculos habeant, dum in poſterum in febre intermittente, præſertim autumnali, de miſſione ſanguinis cogitant; vel dum corpori, ſanguinolento, juvenili, febricitanti, in animo habent vel calidiora ingerere, vel veſicantia apponere; ex juvantibus & lædentibus diſcimus: hæc facta ſunt, eventus fuit peſſimus.

Novi bene quantis me expono periculis, dum hæc publici juris facio; novi quot & quales in me excandefcentes habebo homines; horum omnium, quando veritas pro me pugnat, nihil facio. Boni probique eſt viri, quæ dictitat conſcientia propria ſequi; hanc pro vitæ regula mihi impoſui; ſpero & aliquid emolumenti, hominibus ex hac ipſa hiſtoria futurum; hanc debui veritati, medicæ arti, civibus, amico mortuo, mihi ipſi. Dilacerent famam meam qui volunt; garriant inania medicaſtri; mihi incommoda omnis generis machinent; hæc omnia

omnia temno. Paucis contentus vivere didici, & pauca quæ mihi forte suppeditata erunt, dum nihil contra bonos mores moliar, & mente fruar quieta, divitiis, pravis artibus acquisitis, multum præfero.

F I N I S.




---

E R R A T A.

- P. 4. l. 26. *fuiſſet*, lege *fuera*.  
P. 7. l. 5. *ni* lege *ne*. ut P. 8. l. 1.  
P. 19. l. 28. ante *nihil* lege *ille*.  
P. 20. l. 14. *feci* lege *feci*.  
P. 21. l. 4. *fuiſſe*, lege *fuiſſet*.